

Eki Europako herriak NATOn sartzearen aurkako jarrerari eutsi dio Ieltsinek

Errusiako lehendakaria Woernerrekin bildu zen atzo Bruselan

Boris Ieltsin Errusiako lehendakariak Eki Europako herriak Ipar Atlantikoko Tratatuaren Erakundean (NATO) sartzerik ez du nahi, «horrek Errusiako interesei kalte egingo liekeelako». Hori da, hain justu, iturri diplomatikoen arabera, Ieltsinek Manfred Woerner NATOk idazkari nagusiari atzo adierazi ziona.

BRUSSELA

NATO zabaltzearen aurkako jarrerari eusten jarraitzen du Boris Ieltsinek, «Eki Europako herrialdeak NATOk kide izateak kalte egin diezaiekeelako Errusiako interesei». Bestalde, Eki Europako herriekin segurtasuna lortzeko elkarlanerako proiektuan parte hartzeari buruz oraindik zalantzak ditu Errusiako lehendakariak, atzo Manfred Woerner NATOk idazkari nagusiarekin Bruselan egin zuen bileran azaldu zuenez.


Hori guztia dela eta, Europako segurtasunari buruzko arazoei aurre egiteko «irtenbide orokor bat» lortzeko eskaera egin zion Ieltsinek NATOk idazkari nagusiari.

Bestalde, eta Manfred Woernerrek atzo adierazi zuenez, urtarileko gailurrak NATOren zabaltzeari buruzko deklarazioen printzipioak onartuko ditu, baina «Errusiaren berezko interesak babestuz».

Woernerren hitzekin jarraituz, Errusia Eki Europako herriak NATOn sartzearen aurka badago ere, «badirudi Errusiak Bakearen aldeko Elkartearen proiektuan parte hartuko duela. Elkarlanerako proiektu hori Eki Europako partaide-tzarekin handitu egingo litzateke».

Errusiaren aurrean segurtasuna lortu nahi duten Eki Europako herriengana hurbiltzeko ahaleginetan ari da NATO. Baina, «Moskuren sentsibiltatea mindu gabe, hau ekialdeko bloke handi baten aurrean isolatuta geratuko den beldur da», azaldu zuen Woernerrek.

«Ipar Atlantikoko Tratatuaren Aliantzak segurtasunari buruzko proiektu bat egin du Errusia ere bertako partaide izango dela kontuan hartuta. Proiektu honetako egitura Errusiaren kontra ez dihoala ziurtatu diot nik Ieltsini», adierazi zuen atzo Woernerrek Errusiako lehendakariarekin bilera egin ostean prentsaren aurrean.



Europako Batasunarekin deklarazio politikoa sinatu aurretik bildu zen Ieltsin Woernerrekin.

REUTER

«Beste harresi bat erori da»

BRUSSELA

■ Errusiak eta Europako Komunitateak alde bien arteko elkarlana arautuko duen akordioaren printzipioen deklarazioa sinatu zuten atzo Bruselan. «Errusiaren eta Europaren arteko harremanetan Berlingo beste harresia jausi da gaur», adierazi

zuen sinaketa ekitaldiaren ostean Boris Ieltsin Errusiako lehendakariak, bere herrialdeak pairatzen zuen diskriminazioa «gainditu» egin dela gaineratu aurretik.

Jean Luc Dehane Belgikako lehen ministroak Europako Batasunaren izenean babes osoa eskaini zion atzo Ieltsini. «Erreforma

politiko eta ekonomikoen alde gaude erabat» adierazi zuen Belgikako gobernuburuak. Jacques Delors Europako Batzordeko lehendakaria ere ez zen atzean geratu Ieltsin goraipatzeko orduan, eta Errusiako estaturburua zoriondu zuen «maiz erakutsi duen ausardia eta irmotasunagatik».

Gerrarik nahi ez bada Konstituzioaren alde bozkatzeko eskatu du Ieltsinek

MOSKU

Boris Ieltsinek Kremlingo buruzagiek egindako Konstituzio proiektuaren alde bozkatzeko eskatu zuen atzo telebista bidez herritar guztiei zabalduko mezuan. Lehendakariak azpimarratu nahi izan zuenez, gerra zibila lehertzeko arriskua egongo da Konstituzio berria atzera botatzaren bada.

Aldez aurretik grabatutako mezuan —Bruselan baitzegoen Ieltsin atzo— Legebiltzarrerako hauteskundeetan talde erreformisten alde, «herritarrek politikari zintzo eta ondratuak direla dakiten horien» alde, bozka zezaten eskatu zien hautesleei. Alderdiok Kremlinetik egindako erreforma politiko eta ekonomikoaren aldekoak dira, baina Iegor Gaidar lehen ministroak zuzen-

tzen duen Errusiako Aukera izan ezik, gainerantzekoak Ieltsinengandik aldendu egin dira azkenaldi honetan.

Izan ere, hauteskunde parlamentarioekin batera igande honetan bozkatzekoa den konstituzio proiektuak ahalmen handiak ematen baitizkio lehendakariari. Baina atzo zabalduko mezuan Ieltsinek gogor egin zuen berriz ere aukera honen alde. «Errusiak lehendakari sendoa behar du, ez iraganaldi prozesuan bakarrik, baita etorkizunean ere», defenditu zuen atzo Errusiako estaturburuak.

«Beharbada azken urte hauetako aukera inportanteena dena, egiteko ordua» iristen ari da —jarraitu zuen—, eta aukera honen arabera erabakiko da Errusia 1991ko hauteskunde presidentzialetan eta apirilko erreferen-

dumean aukeratu zen bezalakoa nahi den.

Gerra zibilaren arriskua izan zuen Ieltsinek hizpide, berak egindako proiektuaren aldeko botoaren beharra azpimarkatzeko. «Joan den urrian bakea arrisku bizian egon zen, gerra zibila ate joka ezezik, gure etxeetan ere sartu zen kasik», azpimarratu zuen Ieltsinek «okerrena saihesteko bitarteko bereziak behar izan zirela» arrazoituta.

Gaur egun Errusia berria lege zaharrekin bizitzera «behartua dago», iritzi zion egun indarrean dagoen Konstituzioa gogora ekarrita. Gerrarik nahi ez bada hau aldatu beharra dagoela azpimarratu zuen: «Beste Konstituzio bat behar dugu, baldin eta Errusia bakea izan eta nazioartean gure posizioak indartuko badiugu».

Bitartekariak igandean bildu nahi dituzte Bosniako aldeak

BELGRAD

Thorvald Stoltenberg eta David Owen, Jugoslavia Ohirako Bake Konferentziako lehendakariak, Slobodan Milosevic Serbiako lehendakariarekin bildu ziren atzo, Bosniarako bake negoziaketak berriz ere abian jartzeko asmotan.

Atzo Belgradera joan ziren bezalaxe, herenegun Franco Tudjman Kroaziako lehendakariarekin biltzeko egin zuten bidaia Zagrebera. Tanjug berri agentzia serbiarrak atzo zabaldu zuenez, nazioarteko bitartekariak datorren igandera biderako bildu nahi dituzte buruzagi bosniar, serbiar eta kroaziarrak. Zita Salonikarako (Grezia) egina dute.

Bilera honetan Carolos Papulias Greziako Atzerri ministroaz gain, Tudjman, Milosevic eta Momir Butalovic —Kroazia, Serbia eta Montenegroko lehendakariak, hurrenez hurren— bildu nahi dituzte, Bosnian aurrez-aurre gerran diharduten hiru aldeez gain.

Hego Afrikaren aurkako petrolio enbargo eten egin du NBEk

NEW YORK

Samuel Insanally Nazio Batuetako Batzar Orokorreko lehendakariak bertan behera utzi zuen atzo Hego Afrikaren aurkako petrolio enbargoa. Datorren urteko apirilaren 27an egingo diren hauteskundeak prestatuko dituen Iraganbideko Kontseilu Eragilea osatu ondoren, Pretoriako Gobernuaren aurkako azken zigorra altxatzea erabaki du NBEk.

Nelson Mandela Afrikar Kongresu Nazionaleko (ANC) lehendakariak Nazio Batuen aurrean egindako hitzaldian zigorrak bertan behera uztea eskatu zuen. Berehala erantzun zioten nazioarteko herrialdeek eta baita Nazio Batuek ere: Batzar Orokorrak Hego Afrikaren aurkako zigorrak eten egin zituen joan den urriaren 8an. Baina petrolio enbargoa bere horretan uztea erabaki zuen, harik eta Afrikako herrialde hura demokrazia bidean zela osotara ziurtatu artean.